

Kei Te Matekai

nā Paora Tibble

Amokura

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. Ko wai ka kai i a wai?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia me te ākonga o rātou whakaaro mō te ngaro me te pūngāwerewere. He aha te mahi a te ngaro?

Matapakia te mōhio o te ākonga mō te tāhuahua o ngā kararehe.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.



Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o tēnei pukapuka?
2. E hia ngā waewae o te pūngāwerewere.
3. Mā te aha kai ai te ngaro?
4. Ko wai te atua o ēnei momo kararehe?
5. He kai pea mā tētahi atu te manu? Mā te aha?

Ngā whakautu ki ngā whakapuaki māramatanga

1. Ahakoa te kararehe, he kai mā tētahi atu.
2. E waru ngā waewae o te pūngāwerewere.
3. Mā tana ngongo.
4. Ko Tāne-Mahuta.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

T He rapu mōhio mai i te tuhinga paki.

He whakatakinga ā-roro, he whakaharatau

I mua i te pānui pukapuka, matapakia ngā kupu hou (matekai, ngongo toto). He aha ngā kupu hou ki a koe? Whakaaritia ēnei kupu hou. I tīmata ēnei kupu me te pū?

Kia oti i te ākonga te pukapuka pānui, kōrerotia ngā momo tāhuahua i mōhio ai te ākonga.